

Kitaabka Zakada Maalka

Waxaa dhigay

Dr. Xasanweli Sheekh Xuseen Cismaan, DVM

Marjaca asalka ahna waa kitaabka Zakada ee Dr. Yuusuf Al Qardaawii

iyoo

Kutubbada Fiqiga ee Al Imaamu Al Nnawawii

Tusmada kitaabka

Mawduuca	Bogga
1. Tusmada kitaabka	2
2. Hordhaca dhigaha kitaa bkaan	3
3. Zakada maalka	4
4. Maxaa zako loo bixinayaa?	4
5. Yay bixinta zakadu waajoib ku tahay?	4
6. Aayaha maalka zakada laga bixiyo	5
7. Nisaab	5
8. Zakada dahabka, qalinka iyo lacagta	5
9. Zakada dahabka haweenku xirtaan	5
10. Zakada maalka ganacsiga	6
11. Zakada zaraca beeraha	6
12. Zakada macaadinta	7
13. Zakada rakaazka	7
14. Zakada xoolaha nool	7
15. Shuruudaha guud ee zakada xoolaha nool	7
16. Zakada geela	8
17. Zakada lo'da	8
18. Zakada ariga	9
19. Zakada soonfur	10
20. Xukunka qofka waajibnimada zakada inkirah	10
21. Xukunka qofka bixinta zakada diida	10
22. Ciqaabta aakhiro qofka zakada bixinteeda diida	10
23. Dadka xaqqa u leh in la siiyo zakada maalka	12
24. Shuruudaha ay tahay in laga helo qofka zakada maalka la siinayo	14

Bismi Allaahi Al Rraxmaani Al Rraxiimi

Hordhaca dhigaha kitaabkaan

Al xamdu li Allaahi wa al th-thanaa'u li Allaahi wa Sallaa Allaahu Calaa Sayyidinaa wa Mawlaanaa Muxammadin wa Calaa Aalihi wa Saxbihi wa Sallam tasliiman kathiiran.

Zakadu waa tiirka labaad ee islaamka, waana salaadda walaasheed oo intaasoo Aayadood ayay iskula dhigan yihiin oo isku lammaan san yihiin. Soomaalidu, gaar ahaan reer miyiga, gaar ahaan xoolo dhaqatada way wayneeyaan zakada oo bil dhan ayayba ku magacaabeen oo yiraahdeen 'Bisha Zako' ama "Bisha Dago." Xoolohooda zakada ku waajibtayna way ka bixiyaan Allaha ka abaal mariyee.

Al Imaamu Calii bin Abii Dhaalib, Sallaa Allaahu Calayhi Wasallam, markay geeridu u timid isagoo wiilkiisa Al Xasanu oo caruurtiisa ugu weynaa la dardaarmaya, ayagoo wiilashiisa kalena ay goob joog yihiin wuxuu kula dardaarmay waxaa ka mid ahaa: "ha aqbalin salaadda nin aan zakada maalkiisa bixin."

Sidoo kale Amiiru Al Mu'miniina Cumar, Sallaa Allaahu Calayhi Wasallam, markay geeridu isagana u timid, isagoo wiilkiisa Cabdu Allaahi ibnu Cumar la dardaarmaya wuxuu kala dardaarmay waxaa ka mid ahaa zakada.

Bixinta zakada maalku waxay daahirisaa qalbiga iyo maalka qofka bixiyay iyo qalbiga qofka la siiyayba, siduu Nabigu Sallaa Allaahu Calayhi Wasallam u yirina "maal uma naaquso zako laga bixiyay", waana macnaha Xadiithka.

Allaha nagu hanuuniyo noona sahlo inaan zakada xooloheenna bixinno, zakadaasoo ah kabid ay bulshada qaybihiisu is kabayaan oo kuwa Ilaahay wax siiyay ay ku kabayaan kuwa dan yarta ah.

Wixii qalad ah oo kitaabkaan ku jira waxay ka yimaadeen aniga iyo shaydaan, inta suubanna waa galladaysi Ilaahay Tacaalaa.

Waxaan kitaabkaan ajarkiisa u niyooday labada i dhashay iyo anigaba iyo caruurtayda inuu Ilaahay na siiyo maalin ayan maal iyo wiilal toona wax tarayn qofka Ilaahay qalbi fiyow la hor yimaada mooyee.

Waxaa dhigay midka raxmada iyo dambi dhaafidda Ilaahiis faqiirka u ah

Dr. Xasanweli Sheekh Xuseen Cismaan, DVM

Ottawa, arliga Kanada

Maalin arbaco ah ee bisha Safar ee 1429, una dhiganta 27 Febraayo 2008.

Bismi Allaahi Al Rraxmaani Al Rraxiimi

Zakada Maalka

Zakadu waa tiirka saddexaad oo uu islaamku ku dhisan yahay. Al Zakaatu waa eray Carabi ah macnihiisuna yahay "Kordhin, badasho", oo maalka laga bixiyay badisaa, kana ilaalisaa naaqusid inay dhibaato gaarto iyo baa'ba'. Zakadu waxayna badisaa dhaqaalaha qofka la siiyo. Zako waxaa kale weeye "daahirin", ayadoo daahirisa qofka bixiya iyo maalkiisaba. Zakaat waxaa kaloo weeye "barako", ayadoo uu Ilaahay barakeeyo maalka laga bixiyo. Zako waxaa kaloo weeye "ammaan" uuna helayo qofka bixiya. Erayga Al Zakaat wuxuu Quraanka ku xusan yahay soddon goor, oo sideed iyo labaatan ka mid ah uu salaadda kula xusan yahay isla Aayad, taas ayaana u sabab ah in zakada la yiraahdo "salaadda walaasheed".

Maxaa zakada loo bixinayaa?

Ilaahay SubxaanahuTacaalaa wuxuu Aayadda boqol iyo saddex ee Suuratu Al Tawbah ku yiri: "**Khuth min amwaalihim sadaqatan tudhahiruhum wa tuzakkihim bihaa.**" Aayadda macneheedu waxaa weeye: "Xagga maalkoodana waxaad ka qaadaa zako, aad dambiyada uga daahirineysid, aadna darajadooda ka qaadeysid darajada munaafaqiinta kuna gaarsiineysid darajada mukhlisiinta, xoolohooduna ay ku badanayaan." Al Bukhaarii iyo Muslim waxay wariyeen inuu Rasuulka Ilaahay, Sallaa Allahu Calayhi Wasallam, yiri: "**Fa aclamhum anna Allaaha iftarada calayhim sadaqata amwaalihim, tu'khathu min aghniyaa'ihim, wa turaddu calaa fuqaraa'ihim**", oo ah: "Una sheeg inuu Ilaahay korkooda fardi ka yeelay zakada maalalkooda oo kuwooda hodanka ah laga qaadayo, lana siinayo faqiirkooda."

Yay zakadu waajib ku tahay?

Zakadu waxay waajib ku tahay inuu bixiyo qof kasta oo: (Kow) Muslim ah. (laba) Qaangaar ah. (Saddex) Caqli leh oo aan waalnayn. (Afar) Xor ah oo aan addoon la leeyahay ahayn. (Shan) Leh oo uu gantiisa ku jiro maal gaaray nisaabka ay zakadu ku waajibto. (Lix) Maalkaas uu milkigiisa yahay, uuna siduu doono ugu tasarrufi karo. (Toddoba) Aan dayn lagu lahayn. (Sideed) Wuxuuna ka bixinayaa maalka dheeriga ku ah waxa isaga baahidiisa daboola iyo baahida dadkuu isagu sharciyan xilkooda hayo, sida haweentiisa, caruurtiisa, waalidiintiisa, qaraabo kale, dadka u adeega, hoygiisa, mataaca iyo alaabta gurigiisa, cunnada, dharka, wax barashada, daryeelka caafimaadka, gaadiidka, qalabka uu ku shaqeeyo, kutubbada, hubka, dahabka iyo waxay haweenku is qurxiyaan iyo waxa la midka ah. (Sagaal) Inuu maalkaasu milkigiisa ku jiray laba iyo toban bilood oo bilaha islaamku tirsado ama ka badan, uuna ku haystay nooc kasta oo maal ah sida lacag, dahab, ganacsi iyo wixii la mid ah.

Maalka zakada laga bixiyo

Zakadu waxay waajib ku tahay oo laga bixinayaa dahabka, lacagta, xoolaha nicmooleyda ah ee geela, lo'da iyo ariga, badarka iyo zaraca beeraha, maalka ganacsiga, maalka dhulka hoostiisa lagala soo baxo.

Nisaab

Nisaab waxaa la yiraahdaa in go'an oo maal ah oo markuu maalka qofku gaaro ay waajib ku noqoneyso inuu zakada ka bixiyo. Hadduu maalku nisaabka ka yaryahay zako waajib kuma ah.

Zakada dahabka, qalinka iyo lacagta

Inay zakadu waajib ku tahay dahabka iyo qalinka iyo lacagta waxaa u daliil ah Aayadda afar iyo soddonaad ee Suuratu Al Tawbah: "**Wa Allathiina yaknizuuna al th-thahaba wa al fiddata wa laa yunfiquunahaa fii sabiili Allaahi fa bash-shirhum bi cathaabin aliimim.**" Aayadda macneheedu waxaa weeye: "Iyo kuwa dahabka iyo fiddada, waa qalinkee, kaydsanaya (oo kanz waa maalka aan zakada laga bixin) oo aan ku bixineyn jidka Ilaahay, waa aan zakada ka bixineyne, ugu bishaaree cathaab xanuun badan." Al Bukhaarii iyo Muslim waxay wariyeen inuu Rasuulka Ilaahay, Sallaa Allaahu Calayhi Wasallam, yiri: "**Laysa fii maa duuna khamsi awaaqin sadaqatun**" oo macnihiisu yahay: "Waxa shan wiqiyadood ka yar zako laguma laha." Al Bukhaarii wuxuu Abuu Bakar ka wariyay inuu Rasuulka Ilaahay, Sallaa Allaahu Calayhi Wasallam, yiri: "**Fii al rriqati rubucu al cushri**", oo macnihiisu yahay: "Lacagta macdanta laga tumay waxaa ku waajib ah cushur rubuciis, oo ah laba iyo bar boqolkiiba."

Nisaabka dahabka, oo haddii uu gaaro zakadu ku waajibbayso waxaa weeye labaatan Diinaar oo dahab ah, taasoo u dhigantah shan iyo sideetan graam, ha ahaado dahab ceeriin ah, ha ahaado mid tuman, ha ahaado mid lacag ah, ama si kaleba ahe. Markay taariikhdu ahayd sideed iyo tobanka Ramadaan kun iyo afar boqol iyo toddoba iyo labaatan Hijriga, ahna kow iyo toban Oktoobar laba kun iyo lix, shan iyo sideetan graam oo dahab ah wuxuu suuqa New York ka joogay kun iyo shan boqol kow iyo lixdan doollarka maraykanka. Marka qofka leh shan iyo sideetan graam oo dahab ah, shuruudaha zakaduna u dhan yihiin wuxuu zako ahaan u bixinayaa boqolkiiba labo iyo nus dahabkaas ama lacag qiimihiisa u dhigantah, waana laba graam iyo boqol iyo shan iyo labaatan graam ama sagaal iyo soddon doollar iyo afar iyo labaatan santi oo doollaarka maraykanka. Hadday dahabka ama lacagtu intaas ka badan yahiinna, hadba intii uu yahay ayuu wuxuu ka bixinayaa boqolkiiba laba iyo bar ama kunkiiba shan iyo labaatan. Nisaabka qalinka inuu maalku gaaro uu yahay si ay zako waajib ugu noqoto waa shan boqol iyo shan iyo sagaashan graam. Markuu nisaabka qalinku intaas gaaro ama ka badan zakada ku waajib noqoneysa waa boqolkiiba laba iyo nus.

Zakada dahabka haweenka

Dahabka iyo qalinka iyo dheemmanka iyo waxa la midka ah ee ay haweenku isku qurxiyaan zako waajib kuma ah. Afarta math-habba waxay qabaan inaan zakao lagu

lahayn, oo yiri waxay la mid yihiin geela iyo lo'da shaqeeya. Maalik wuxuu Al Muwadh-dha' uga wariyay ibnu Cumar iyo Caa'ishah, Allaaha raalli ka wada noqdee, inay Caa'ishah gabdhaha agoonta ah ee walaalkeed ka dhintay ayaduna xilkooda haysay dahabkaas u xiri jirtay, zakana ayan k abixin jirin. Mana jiro Xadiith laga wariyay Nabiga, Sallaa Allaahu Calayhi Wasallam, uu dahabka haweenka zako ku xukumay. Waxaa jira Xadiith haweeney ku gooni ahaa.

Zakada maalka ganacsiga

Inay maalka ganacsiga zaku waajib ku tahay waxaa u daliil ah Aayadda laba boqol iyo toddoba iyo lixdan e Suuratu Al Baqarah: **"Yaa ayyuhaa allathiina amanuu anfiqun min dhayyibaati maa kasabtum"**, oo macneheedu yahay: "Kuwiinna rumeeyeyow, zakada ka bixiya xagga kuwooda fiican ee waxaad kasbateen, oo qaybta xun ha ka bixinnina, kuna kasbateen ganacsi ama sanco." Al Daarqudhniyyu iyo Abuu Daaud waxay ka wariyeen Samurah bin Jundub: "Rasuulka Ilaahay, Sallaa Allaahu Calayhi Wasallam, wuxuu nagu amray inaan maalkeenna ganacsiga zako ka bixinno." Dhammaadka bisha laba iyo tobnaad ee sanadka islaamka ayaa waxaa la xisaabayaa ganacsigaas: badeecadda taalla ayna ku jirto inta dayn ku maqan oo dhakhso la sugayo iyo faaiidada. Kulligoodna waxaa lagu xisaabayaa sicirka maalintaas. Nisaabka maalka laga kasbo tijaarada oo markii uu gaaro ay waajib ku noqoneyso in zakada laga bixiyo waxaa weeye shan iyo sideetan gram oo dahab ah ama lacag qiimeheeda u dhigma. Markaasaa waxaa zaka ahaan laga bixinayaa boqlkiiba laba iyo nus.

Zakada zaraca beeraha

Inay zaraca beeraha zako waajib ku tahay waxaa u daliil ah Aayadda laba boqol iyo toddoba iyo lixdan ee Suuratu Al Baqarah: **"Yaa ayyuhaa allathiina amanuu anfiqun min dhayyibaati maa kasabtum wa mimmaa akhrajnaa lakum mina al ardi"**, oo macneheedu yahay: "Kuwiinna rumeeyeyow, zakada ka bixiya xagga kuwooda fiican ee waxaad kasbateen, oo waxa xun ka bixinnina, kuna kasbateen ganacsi ama sanco iyo zaraca aan dhulka idiinka soo saarnay". Wuxuu kaloo Ilaahay Tacaal Aayadda boqol iyo kow iyo afartan ee Suuratu Al Ancaami ku yiri: **"Kuloo min thamarahi ithaa athmara wa aatuu xaqqahu yawma xasaadihi"**, oo macneheedu yahay: "Kana cuna xagga mirihiisa markuu miro bixyo, xaqqiisana ka guda oo zakada ka bixiya marka lasoo gooyo." Rasuulka Ilaahay, Sallaa Allaahu Calayhi Wasallam, wuxuu yiri: **"Fiimaa saqat Al Ssamaa'u wa al cuyuunu aw kaana cathariyyan al cushru wa fiimaa yusqaa bi al nnadxi nisfu al cushuri"**, oo macnihiisu yahay: "Beerta biyo roob oo Samada ka yimid ku waraabta ama ilo dhulka kasoo burqada ama ka waraabta biyaha biyo xireennada ama biyo ku socda gacan biyaha roobka kasoo qaaday god loo qoday oo ay isugu yimaadaan oo geedka salkiisa ku shubaya zakada waajibka ku ah waa cushur (1/10) oo ah mireheeda boqolkiiba toban. Beerta lagu waraabiyo ceel ama ay xoolo waraabiyaan ama gacantaba lagu waraabiyo ama rushayn ama wadaan ama biyo lasoo gatayba, waxaa ku waajib ah cushur nuskiis (1/20) oo ah boqolkiiba shan. Zakadu waxay waajib ku tahay miraha beerah oo la kaydin karo sida badarka noocyadiisa oo idil, qamadiga iyo waxa la midka ah iyo timirta iyo canabka, oo canabka waxaa zakada laga bixiyaa markuu qallalo oo zabiib noqdo. Nisaabka miraha beeruhu waa lix boqol iyo saddex iyo konton

kiiloograam, oo Al Bukhaarii wuxuu wariyay inuu Rasuulka Ilaahay, Sallaa Allahu Calayhi Wasallam yiri: "**Laysa fiimaa duuna khamsati awsuqin sadaqatun**" oo ah "waxa shan awsaq ka yar zako waajib kuma aha."

Zakada macaadinta

Inay macaadinta zaku waajib ku tahay waxaa u daliil ah Aayadda laba boqol iyo toddoba iyo lixdan ee Suuratu Al Baqarah: "**Yaa ayyuhaa allathiina aamanuu anfiqun min dhayyibaati maa kasabtum wa mimmaa akhrajnaa lakum mina al ardi**", oo macneheedu yahay: "Kuwiinna rumeeyeyow, zakada ka bixiya xagga kuwooda fiican ee waxaad kasbateen, oo waxa xun ka bixinnina, kuna kasbateen ganacsi ama sanco iyo waxaan dhulka idiinka soo saarnay". Al Bukhaarii wuxuu wariyay inuu Rasuulka Ilaahay, Sallaa Allahu Calayhi Wasallam, yiri: "**Fii al rriqati rubucu al cushri**", oo macnihiisu yahay: "Lacagta macdanta ka sameysan waxaa ku waajib ah cushur rubuciiis, oo ah laba iyo bar boqolkiiba." Zakada macaadiintu waa laba iyo nus boqolkiiba oo isla markiiba laga bixinayo oo aan sanad inuu kasoo wareegto la sugayn. Macdanna waa ama wax jirmi leh sida birta oo kale ama dureera sida patrolka oo kale. Waxaa kalo la yiri inay dahabka iyo qalinka oo keli macdan ahaan zako waajib ku tahay. Runtana Rabbi ayaa og.

Zakada Rakaazka

Rakaax waxaa la yiraahdaa maal dhulka ku duugan oo islaamka hortii lagu duugay. Al Bukhaarii wuxuu wariyay inuu Rasuulka Ilaahay, Sallaa Allahu Calayhi Wasallam, yiri: "**Wa fii al rrakaazi al khumus**", o macnihiisu yahay: "Rakaazkana waxaa lagu leeyahay khumus oo ah marka shan meelood loo dhigo meel", waana boqolkiiba labaatan" oo isla markiiba la bixinayo. Xw1427H/2006

Al Bukhaarii wuxuu Cumar ka wariyay inuu Rasuulka Ilaahay, Sallaa Allahu Calayhi Wasallam, yiri: "**Al Islaamu an tash-hada an laa ilaaha illaa Allahu wa anna Muxammadan Rasuulu Allaahi , Sallaa Allahu Calayhi Wasallam, wa tuqiima al ssalaata, wa tu'tii al zzakaata, wa tasuuma ramadaana, wa taxujja Al Bayta, ini istadhacta ilayhi sabiilan.**" Xadiithka macnihiisu waxaa weeye: "Islaamku waa inaad ka markhaati kacdaa inuusan jirin ilaah aan Ilaahay ahayn, iyo Muxammad, Rasuulka Ilaahay yahay, Sallaa Allahu Calayhi Wasallam, aad salaadana oogtaa, zakadana bixisaa, ramadaanna soontaa, Baytkana u xajjidaa haddaad tegi kartid."

Zakada xoolaha nool

Xoolaha nool oo Ilaahay, Subxaanahu wa Tacaalaa, abuuray, waxay zakadu ku waajibtay in laga bixiyo saddex nooc oo kala ah geela, lo'da iyo ariga. Arigu wuxuu ka kooban yahay riyaha iyo idaha.

Shuruudaha guud ee zakada xoolaha nool

(Kow). Shardiga koowaad waa in tirada xooluhu ay gaaraan tiradii ay zakadu waajib ku noqon lahayd, oo ah nisaabka. (Laba). Shardiga labaad waa in lahaanshaha xoolahaas ay laba iyo toban bilood oo bilaha Carabiga ay ka soo wareegeen. (Saddex). Shardiga

saddexaad waa in xoolahaasu yihiin kuwa daaqa duurka iyo daaqsiiin furan, oo ayan ahayn kuwo lagu hayo guryo dhexdood, cuntana gacanta laga siiyo. (Afar). Shardiga afaraad waa inayan xoolahaasu ahayn kuwa shaqeeya sida xoolaha beeraha lagu falo, kuwa beeraha lagu waraabiyo, kuwa xamuulka lagu qaado, kuwa macsarada shiida, iyo wixii la mid ah. Haddii afartaas shardi la wada waayo, ama midkood ama ka badanba la waayo, xoolahaas zako waajib kuma aha.

Zakada geela

Al Bukhaarii wuxuu ka wariyay Anas bin Maalik, in markuu Abuu Bakar u diray Baxrayn uu u dhigay warqad ay ku dhigantahay: "Bismi Allaahi Al Rraxmaani Al Rraxiimi. Tirada ugu yar ee geel ah oo zakadu waajib ku tahay waa shan halaad oo geel ah. Qofka tiro shan neef ka yeer oo geel ah leh, zako waajib kuma aha. Shan ilaa sagaal halaad oo geel ah waxaa waajib ku ah oo laga bixinayaa hal neef oo ari ah. Toban ilaa afar iyo toban halaad oo geel ah waxaa waajib ku ah oo laga bixinayaa laba neef oo ari ah. Shan iyo toban ilaa sagaal iyo toban halaad oo geel ah waxaa waajib ku ah oo laga bixinayaa saddex neef oo ari ah. Labaatan ilaa afar iyo labaatan halaad oo geel ah waxaa waajib ku ah oo laga bixinayaa afar neef oo ari ah. Shan iyo labaatan ilaa shan iyo soddon halaad oo geel ah waxaa waajib ku ah oo laga bixinayaa hal neef oo geel ah oo dheddig ah oo hal sano u buuxsantay, gashayna sanadkii labaad ee cumrigeeda. Lix iyo soddon ilaa shan iyo afartan halaad oo geel ah waxaa waajib ku ah oo laga bixinayaa hal neef oo geel ah oo dheddig ah oo laba sano u buuxsantay, gudana gashay sandkii saddexaad oo cumrigeeda. Lix iyo Afartan ilaa lixdan halaad oo geel ah waxaa waajib ku ah oo laga binayaa hal neef oo geel ah oo dheddig ah oo saddex sano u buuxsantay, gudana gashay sanadkii afaraad ee cumrigeeda. Kow iyo lixdan ilaa shan iyo toddobaatan halaad oo geel ah waxaa waajib ku ah oo laga bixinayaa hal neef oo geel ah oo dheddig ah oo afar sano u buuxsantay, gudana gashay sandkii shanaad ee cumrigeeda. Lix iyo toddobaatan ilaa sagaashan halaad oo geel ah waxaa waajib ku ah oo laga bixinayaa laba neef oo geel ah oo dheddig ah oo middiiba laba sano u buuxsantay, gudana gashay sanadkii saddexaad ee cumrigeeda. Kow iyo sagaashan ilaa boqol iyo labaatan halaad oo geel ah waxaa waajib ku ah oo laga bixinayaa laba neef oo geel ah oo dheddig ah, oo middiiba ay saddex sano u buuxsantay, gudana gashay sanadkii afaraad ee cumrigeeda."

Zakada lo'da

"Tirada ugu yar oo ay lo'da zakadu waajib ku noqoneyso waa soddon neef. Tiradii soddon neef ka yar zako waajib kuma aha. Hadday tirada lo'du soddon neef gaarto waxaa waajib ku ah oo laga bixinayaa hal neef oo lab ama dheddig ah oo ay hal sano u buuxsantay, kuna dhex jirah sanadkii labaad ee cumrigiisa.

Hadday tirada lo'du gaarto afartan ilaa sagaal iyo konton neef waxaa ku waajibtay oo laga bixinayaa hal neef oo lo' ah oo dheddig ah oo laba sano u buuxsantay, kuna dhex jirtah sanadka saddexaad ee cumrigeeda. Hadday tirada lo'du gaarto lixdan ilaa sagal iyo lixdan neef waxaa ku waajibtay oo laga bixinayaa laba neef oo lo' ah oo labood ah oo midkiiba ay hal sano u buuxsantay, kuna dhex jirah sanadkii labaad ee cumrigiisa. Hadday tirada lo'du gaarto toddobaatan ilaa sagaal iyo toddobaatan neef waxaa ku waajibtay oo laga bixinayaa laba neef oo lo' ah oo kala ah: hal neef oo dheddig ah oo laba sano u

buuxsantay kuna dhex jirtah sandka saddexaad ee cumrigeeda, iyo hal neef oo labood ah oo ay u buuxsantay hal sano, kuna dhex jirah sanadka labaad ee cumrigiisa. Hadday tirada lo'du gaarto siddeetan ilaa sagaal iyo siddeetan neef waxaa ku waajibtay oo laga bixinayaa laba neef oo lo' ah oo dheddig ah oo ay middiiba laba sano u buuxsantay, kuna dhex jirto sanadka saddexaad ee cumrigeeda. Hadday tirada lo'du gaarto sagaashan ilaa sagaal iyo sagaashan neef, waxaa ku waajibtay oo laga bixinayaa saddex neef oo lo' ah oo labood ah, oo midkiiba ay u buuxsantay hal sano, kuna dhex jira sanadka labaad ee cumrigiisa.

Hadday tirada lo'du gaarto boqol ilaa boqol iyo sagaal neef, waxaa ku waajibtay oo laga bixinayaa saddex neef oo lo' ah oo kala ah sidatan: hal neef oo dheddig ah oo ay u buuxsantay labo sano, kuna dhex jirta sanadka saddexaad ee cumrigeeda, iyo laba neef oo labood ah oo ay midkiiba u buuxsantay hal sano, kuna dhex jira sanadka labaad ee cumrigiisa. Hadday tirada lo'du gaarto boqol iyo toban ilaa boqol iyo sagaal iyo toban neef, waxaa ku waajibtay, oo laga bixinayaa saddex neef oo lo' ah oo kala ah sidatan: laba neef oo dheddig ah oo middiiba ay u buuxsantay laba sano, kuna dhex jirta sanadka saddexaad ee cumrigeeda, iyo hal neef oo labood ah oo ay hal sano u buuxsantay, kuna dhex jira sanadka labaad ee cumrigiisa. Hadday tirada lo' du gaarto boqol iyo labaatan ilaa boqol iyo sagaal iyo labaatan neef, waxaa ku waajibtay oo laga bixinayaa saddex neef oo lo' ah oo dheddig ah oo middiiba ay laba sano u buuxsantay, kuna dhex jirto sanadka saddexaad ee cumrigeeda; ama waxaa laga bixinayaa afar neef oo lo' ah oo labood ah oo midkoodiiba ay hal sano u buuxsantay, kuna dhex jiro sanadka labaad ee cumrigiisa.

Wixii lo' ah oo intaas ka badan, soddonkii neefba waxaa ku waajibtay oo laga qaadayaa hal neef oo lo' ah oo labood ah ama dheddig ah oo ay hal sano u buuxsantay, kuna dhex jira sanadka labaad ee cumrigiisa.

Afartankii neef oo lo' ahna waxaa ku waajibtay oo laga qaadayaa hal neef oo lo' ah oo dheddig ah oo laba sano u buuxsantay, kuna dhex jirtah sanadka saddexaad ee cumrigeeda." Inay zakada lo'da waajibka ku ah sidaas tahay waxaa u daliil ah Xadiithkaas ay Axmad, Tarmathi, Nasaai' ka wariyeen Mucaath bin Jabal.

Zakada ariga

Erayga "ari" wuxuu koobaa riyaha iyo idaha. "Tirada ugu yar oo ari ah oo zakadu ku waajibtay waa afartan neef. Tirada arigu hadday gaarto afartan ilaa boqol iyo labaatan neef waxaa ku waajibtay oo laga bixinayaa hal neef oo ari ah. Hadday tirada arigu gaarto boqol iyo kow iyo labaatan ilaa laba boqol oo neef, waxaa waajib ku ah oo laga bixinayaa laba neef oo ari ah. Hadday tirada arigu gaarto laba boqol ilaa saddex boqol iyo sagaal iyo sagaashan neef waxaa ku waajibtay, oo laga bixinayaa saddex neef oo ari ah.

Hadday tirada arigu gaarto afar boqol ilaa afar boqol iyo sagaal iyo sagaashan neef, waxaa ku waajibtay oo laga bixinayaa afar neef oo ari ah. Hadday tirada arigu gaarto shan boqol ilaa shan boqol iyo sagaal iyo sagaashan neef, waxaa ku waajibtay oo laga bixinayaa shan neef oo ari ah. Wixii intaas ka badan, boqolkii neefba waxaa ku waajib ah oo laga bixinayaa hal neef oo ari ah. Tiradii ari ah oo afartan neef ka yar zako waajib kuma aha, in qofka arigaas iska leh uu doono inuu bixiyo mooyee. Ariga zakada loo bixinayaa waa inuusan ahayn mid da' wayn oo gaboobay, ama mid ceebo leh, ama waxaro yaryar, ee waa inuu ahaado kuwo meel dhexaad ah, oo aan ahayn kuwa ariga ugu

buurbuuran oo ugu fiican iyo kuwa ugu caato badan oo ugu liita midkoodna. Sidoo kale ma aha in orgiyada iyo wananka laga qaadoh."

In zakada ariga ku waajibtay ay sidaas kor ku qoran ay tahay waxaa u daliil ah Xadiithka ay wariyeen Shaafici, Bukhaari, Axmad, Abuu Daauud, Nasaai' iyo kuwa kaleba, kulligood Allaha Kariimka ah raalli ka noqdee, ayna ka wariyeen Anas bin Maalik, oo ka wariyay Abuu Bakar Al Siddiiq.

Zakada Soonfur

Waxay waajib ku tahay inuu bixiyo qof kasta oo muslin ah, oo haysta wax ka badan quutkiisa iyo quutka ciyaalkiisa maalinta ciidda iyo habeenkeeda. Waxaa ku waajib ah inuu ka bixiyo naftiisa, iyo inta nafaqadooda lagu leeyahay, sida haweeniisa, caruurtiisa, khaadimintiisa. Zakadaas waa laba kiilo oo bur ah ama afar kiilo oo timir ah ama lacag qiimohooda u dhigantah.

Waxaa la bixin karaa maalinta uu Ramadaan dhasho ilaa maalinta Ciidda ah intaan Salaadda Ciidda la tukan. Waxaad siin kartaa, oo haboon, qaraabadaada u baahan, dal kaleba ha joogaane.

Xukunka qofka waajibnimada zakada inkirah

Qofka waajibnimada Zakada inkirah, o isagoo ogsoon waajibnimadeeda hadana yiraahda waajib ma aha oo dadka hodanka ah laguma laha, waa gaaloobay, Diinta Islaamkana waa ka baxay, maxaa yeelay wuxuu beeniyay Ilaahay, Subxaanahu wa Tacaalaa, wuxuuna beeniyay Rasuulka Ilaahay, Sallaa Allaahu Calayhi Wasallam. Marka xukunkiisu, hadduusan ka tawbad keenin, waa xukunka murtadka oo waxaa loo ban dhigayaa inuu tawbad keeno, hadduu diidana seef ayaa madaxa looga goynayaa.

Xukunka qofka bixinta zakada diida

Qofkii isagoo waajibnimada Zakada qirsan iyo inay ka mid tahay tiirarka Diinta Islaamku ku dhisantahay, hadana bixinteeda diida, waxaa u sugnaaneysa saddex nooc oo ciqaab ah: Kow. Ciqaab adduunyadaan ku haleeleysah, oo xagga Ilaahay uga imaaneyshah oo ah abaar iyo gaajo, maalkiisuna waa fasaadayaa oo xumaanayaa.

Laba. Ciqaab xagga shareecada iyo Dawladda Islaamka uga imaaneyshah oo ah sidatan. Zakada xoog ayaa looga qaadayaa . Ciqaab ahaan iyo edbin iyo inuu dadka intiisa kale ku cibrad iyo waano qaato, oo aan zakada bixinteeda la diidin, maalkiisa oo dhan ayaa marka zakada laga qaaday inta usoo hartay laba meelood loo qaybinayaa oo markaas bar ama nus ganaax ahaan ay Dawladdu u qaadanaysaa.

Saddex. Ciqaab Aakhiro ku haleeleysah.

Ciqaabta aakhiro

Al Bukhaarii wuxuu kitaabka zakada ku wariyay inuu Rasuulka Ilaahay, Sallaa Allaahu Calayhi Wasallam, yiri: "**Man ataahu Allaahu maalan falam yu'addi zakaatahu muth-thila lahu yawma al qiyaamati shujaacan agraca lahu zabiibataani yudhawwiquhu yawma al qiyaamati thumma ya'khuthu bilihzimatayhi, yacnii**

bishadqayhi, thumma yaquulu: "Anaa Maaluka, anaa kanzuka", thumma talaa: "Wa laa yaxsabanna allathiina yabkhaluuna bimaa aataahumu Allaahu min fadlihi huwa khayran Ilaahum bal huwa sharrun Ilaahum sayudhawwaquuna maa bakhiluu yawma al qiyaamati wa Lillaahu miraathu Al Ssamaawaati wa al ardi wa Allaahu bimaa tacmaluuna khabiirun."

"Qofka Ilaahay maal siiyey oo aan zakada ka bixin waxaa maalinta qiyaame maalkii looga soo dhigayaa mas lab ah oo cumri dheer oo sun badnidiisa daraadeed uusan korkiisu timo lahayn, labada indhood korkoodana laba bar oo madaw ku leh, ama isha korkeedaba dhibic madaw ku leh. Markaasuu inta isku duubo oo labada daan ka qaniino ayuu wuxuu ku leeyahay: "Anigu waxaan ahay maalkaagii aad kaydsatay." Markas akaadib ayu Rasuulka Ilaahay, Sallaa Allaahu Calayhi Wasallam, wuxuu akhriyay (Waana Aayadda boqol iyo sideetan ee Suuratu Aali Cimraana) oo macneheedu yahay: "Yeeyanna u malaynin kuwa ku baxhiilaya Ilaahay deeqdiisa uu siiyey inay khayr u tahay, oo ah maal ama cilmi ama xirfad, caqli iyo xeeladba, bal waxay u tahay shar. Maalinta qiyaamene waxaa lagu duubayaa, oo luqunta loogu duubayaa oo kuul looga dhigayaa, waxay ku baxhiileen. Ilaahay ayaana iska leh dhaxalka Samaawaadka iyo arliga. Ilaahay waxaad falaysaanna wuu ogyahay."

Wuxuu Muslim Abuu Hurayrah ka wariyay inuu Nabigu, Sallaa Allaahu Calayhi Wasallam, yiri: **"Maa min saaxibi thahabin wa laa fiddatin laa yu'addii minhaa xaqqahaa illaa ithaa kaana yawmu al qiyaamati, suffixat lahu safaa'ixu min naarin fa uxmiya calayhaa fii naari jahannama, fa yukwaa bihaa janbuhu wa jabiinuhu, wa thahruhu, kullamaa baradat uciidat lahu, fii yawmin kaana miqdaaruhu khamsiina alfa sanatin xattaa yuqdaa bayna al cibaadi, fa yaraa sabiilahu immaa ilaa al jannati wa immaa ilaa al nnaari."** Qiila: "Yaa Rasuula Allaahi, fa al ibilu?"
Qaala: "Wa laa saaxibu ibilin laa yu'addii minhaa xaqqaha , wa min xaqqihaa xalbuhaa yawma wirdihaa, illaa ithaa kaana yawma al qiyaamati, budhixa lahaa biqaacin qarqarin awfara maa kaanat, laa yafqidu minhaa fasiilan waaxidan, tadha'uhu bi axfaafihaa wa tacudduhu bi afwaahihaa, kullamaa marra calayhi awlaahaa rudda calayhi ukhraahaa fii yawmin kaana miqdaaruhu khamsiina alfa sanatin xattaa yuqdaa bayna al cibaadi, fa yaraa sabiilahu, immaa ilaa al jannati wa immaa ilaa al nnaari." Qiila: "Yaa Rasuula Allaahi, fa al baqaru wa al ghanamu?"
Qaala: "Wa laa saaxibu baqarin wa laa ghanamin laa yu'addii minhaa xaqqahaa, illaa ithaa kaana yawmu al qiyaamati budhixa lahu bi qaacin qarqarin, laa yafqidu minhaa shay'an, laysa fiihaa caqsaa'u wa laa jalxaa'u wa laa cadbaa'u tandhixuhu bi quruunihaa wa tadha'uhu bi athlaafihaa, kullamaa marra calayhi awlaahaa rudda calayhi ukhraahaa fii yawmin kaana miqdaaruhu khamsiina alfa sanatin xattaa yuqdaa bayna al cibaadi fa yaraa sabiilahu, immaa ilaa al jannati wa immaa ilaa al nnaari." Xadithka macnihiisu waxaa weeye: "Ma jiro qof leh dahab iyo fiddo o aan xaqqooda ka bixin ee illaa maalinta qiyaame waxaa dahabkaas iyo qalinkaas looga sameeyaa waraaqo fidsan sida saxammo oo kale. Markaasaa waxaa saxammadaas fidsan lagu soo kululeeyaa naarta Jahannama. Markaasaa waxaa saxammadaas looga gubaa dhinacyadiisa iyo wajigiisa iyo dhabarkiiisaba, oo marka qof baxhiil ah la baryo oo wax la weydiistoh, waxaa wajigiisa kolkiiba ka muuqaneysa kahasho iyo diidmo, markaasuu wajiga aruuriyaa oo kuduudiyaa. Hadduu qofka wax baryayay mar kale baryada ku celiyo, baxhiilku dhinac ayuu isku dadbaa oo kan wax weydiistay ayuu dhiniciisa soo xijiyaa. Hadduu kan baryootamayay tuugmadii sii wado, kan bakhaylka ahi waaba ka

jeestaa, oo dhabarkuu xijiyaa, isagoo jiha kale wajigiisa u duwaya, taasoo diidmadiisa iyo kahashadiisaba inuu wax bixiyo dhammaystiraysa.. Markay saxammadaas qaboobaanna inta naarta lagu soo kululeeyo ayaa hadana lagu gubaa oo sidaas lagu haynayaa maalin qadarkeedu konton kun oo sano yahay, ilaa addoommada la kala xukummo. Markaas kaddib ayuu arkayaa dariiqiisa uu qaadi lahaa oo geynayay ama jannada ama naarta." Markaasaa waxaa la yiri: "Rasuulka Ilaahayow, Sallaa Allaahu Calayhi Wasallam, geelana?" Wuxuu Sallaa Allaahu Calayhi wasalam yiri: "Ma jiro qof geel leh oo aan xaqqiisa ka bixinayn -xaqqiisana waxaa ka mid ah in maalinta ceelka lasoo arooriyo oo biyo la waraabinayo caanihiisa dadka goobtaas jooga oo u baahan loo liso oo la siiyo-ilaa markay tahay maalinta qiyaame waxaa qofkaas loo seexiyaa xagga calooshiisa isagoo wajigiisu hooseeyo meel waasac ah oo siman oo sulub ah. Markaasaa geelii oo intii ka burbuuran oo ayan nirigna ka maqnayn ayaa kor mara oo ku joogjoogsada oo cagaha kula tunta, afkana ku qaniina. Marka geelii wada kor maro, kiisii ugu horreeyey iyo kii ugu dambeeyey, ayaa mar kale hadana lagu soo celiyaa oo sidaas lagu hayaa maalin qadarkeedu konton kun oo sano yahay, inta laga kala xukumayo addoommada. Markaasuu dariiqiisa uu mari lahaa arkaa, kaasoo ama jannada geynaya ama naarta geynaya." Waxaa la yiri: "Rasuulka Ilaahayow, Sallaa Allaahu Calayhi Wasallam, lo'da iyo arigana?" Wuxuu Sallaa Allaahu Calayhi Wasallam yiri: "Ma jiro qof leh lo' iyo ari oo an xaqqooda ka bixin ee ilaa markay tahay maalinta qiyaame waxaa qofkaas loo seexiyaa dhanka calooshiisa isagoo wajigiisu hooseeyo, meel waasac ah oo siman oo sulub ah, ayagoo lo'dii iyo arigii uusan midna ka maqnayn, ayanna ku jirin ri' geeso laablaaban iyo ri' aan geeso lahayn iyo ri' geeso jaban, markaasay ku hardinayaan oo ku mudayaan geesohooda, oo ay cagahana kula tumanayaan. Markay wada kor maraan, ayaa hadana lagu soo celinayaa, oo sidaas ayuu ahaanayaa maalin qadarkeedu konton kun oo sano yahay, ilaa inta addoommada la kala xukummo. Markaas ayuu dariiqiisa uu mari lalaa arkaa, kaasoo ama jannada ama naarta geynaya."

Dadka xaqqa u leh zakada maalka in la siiyo

Dadka xaqqa u leh in maalka zakada la siiyo, ay tahayna in la siiyo, waxaa tilmaamay Ilaahay, Subxaanahu wa Tacaalaa oo ku magacaabay Aayadda lixdanaad ee Suuratul Tawbah:

"Innamaa al ssadaqaatu li al fuqaraa'i wa al masaakiini wa al caamiliina calayhaa wa al mu'allafati quluubuhum wa fii al rriqaabi wa al ghaarimiina wa fii sabiili Allaahi wa ibni al ssabiili fariidatan mmina Allaahi wa Allaahu Caliimun Xakiimun." Aayadda macneheedu waxaa weeye:

Aayadda macneheedu waxaa weeye: "Zakada waxaa iska leh (Kow) Kuwa faqiirka ah. (Labo) Masaakiinta. (Saddex) Kuwa ka shaqeeya oo soo uruuriya. (afar) Kuwa quluubtooda islaamka loo soo dumayo. (Shan) Muslimiinta la addonsado in lagu gato oo lagu xoreeyo. (Lix) Kuwa daynta badan lagu leeyahay o iska bixin waayey. (Toddoba) Jihaadka kuwa ku jira. (Sideed) Kuwa safarka ku jira o sahydo ka go'day. "Ilaahay waa farad yeelay zakadaas, fardi yeelid Ilaahay xaggiisa ka sugnaatay, Ilaahayna waa ogyahay, oo qof walba xaalkiisa waa og yahay. Xakiimna weeyoo, waa Xakiim Caadilnimo wax ku maamula, oo qof walba wixii uu mutaystay ku abaal mariya".

Siddeed nooc oo dad ah ayaa Ilaahay, Subxaanahu wa Tacaala, magacaabay inay u sugnaatay oo ay xaq u leeyihiin zakada laga soo qaado dadka hodanka ah oo bulshada

muslimiinta ka mid ah.

Kow. Faqiirka Faqiir waxaa la yiraahdaa qofka aan wax maal la yiraahdabana aan lahayn iyo wax kasab ah oo dhan, ama wax leh, laakiin waxa uu haysto ay ka yaryihiin nus inta dabooli karta baahidiisa isaga iyo inta nafaqeyntooda xil ka saaran yahay, sida haweentiisa, caruurtiisa, labada waalid oo dhalay. Baahidiisu waxaa weeye baahida cuntada, hoyga, dharka, gaadiidka, cilmiga. Tusaale ahaan, haddii ay baahidiisa toban shilin dabooli karto wuxuu haystaa labo ama saddex ama afar.

Lab. Miskiin. Miskiin waxaa la yiraahdaa qofka maal wax ka haysta ama kasab, laakiin intuu haysto ay u dhiganto nus ama wax la mid ah inta u dabooli karta baahidiisa isaga iyo inta uu nafaqayntooda xilkooda hayo. Tusaale ahaan, haddii ay baahidiisa dabooli kartay toban, wuxuu haystaa lix ama toddoba.

Saddex. Kuwa ka shaqeeya. Kuwaan waa shaqaalaha dadka maalka leh zakada ka soo uruuriyah, kula xisaabtama inta qof walba ku waajibtay, kaddibna isku geeya, hadday xoolo nool yihiin xannaaneeya oo dhaqaaleeya. Guud ahaan waxaa weeye dadka maalka zakada ka shaqeeya. Haddii qofkaas zakada ka shaqeeyaa uu hodan yahay waxba laga siin mahayo. Hadduu mushaar ku qaatana zakada wax laga siin mayo. Haddii kale, oo uusan hodanna ahayn, mushaarna ku qaadanin, masruuf iyo intii deeqda ayaa laga siinayaa.

Afar. Kuwa quluubtooda la dumayo. waxay ka koobmaan dhawr nooc oo dad ah, ayna ka mid yihiin:

b) kuwo dhowaan Diinta Islaamka soo galay, iimaankoodu daciif yahay, maalka zakadana wax looga siinayo in iimaankooda lagu xoojiyo oo ay islaannimada ku sugnaadaan, oo haddii ay baahdaan laga yaabo inay gaalnimadoodii hore ku noqdaan.

t) Kuwa Diinta Islaamka soo galay, iimaankooduna xoog leeyahay, maalka zakadana wax looga siinayo si ay dadka ayaga ka dambeeya u soo jiitaan oo ay Diinta Islaamka soo galaan.

j) Dad sidoodaba gaalo ah, lagase rajo qabo inay Diinta Islaamka soo galaan.

Shan. Luqummaha fakintooda. waa dad muslimiin ah addoonnimana ku jira, oo dad kale oo banii Adam ah uu leeyahay, xoreyntoodana maal ku xiray. Waxaa dadkaas maalka zakada wax looga siinayaa inay luquntooda ku fakiyaan, oo sidaas ku xoroobaan.

Lix. Kuwa daymoobay. Kuwaani waa dadka galay dayn badan, awoodna aan u lahayn inay iska bixiyaan. Waa isku mid in uu qofkaas dayntaas u galay danta iyo maslaxadda guud, iyo inuu u galay si khaas ah oo isaga u gaar ah. Maalka zakada ayaa qofkaas wax laga siinayaa si uu dayntaas isaga gudo.

Toddoba. Jidka Ilaahay. Qaybtaan waxaa weeye nafaqeynta dadka naftooda u soo bandhigay oo ku jira jihaad lagula dagaallamayo gaalada si ay Laa ilaaha illaa Allaahu Muxammadun Rasuulu Allaahi, Sallaa Allaahu Calayhi Wasallam, u ahaato kalimada sarreysa.

Sideed. Jidka wiilkiisa. Waxaa jidka wiilkiisa Ilaahay, Subxaanahu wa Tacaalaa, ku magacaabay qofka socdaalka ku jira, oo jidka haya. Waxaa laga cabbiray in jidku qofkaas dhalay. Haddii ay qofkaas socotada ah sahaydu ka go'do, ama gaadiidku ka go'o, ama maalkii uu u baahnaa si uu meeshuu u socday, ama gurigiisaba ku gaari lahaa ka go'o, maalka zakada ayaa laga siinayaa.

Shuruudaha ay tahay in laga helo dadka zakada la siinayo

(Kow) Inuu muslim yahay. (Labo) Xor yahay. (Saddex) Inuusan Aali Muxammad, Sallaa Allaahu Calayhi Wasallam, ka mid ahayn oo ayan sadaqadu u bannaaneyn, waana Bani Haashim iyo Bani Al Mudh-dhalib

Xw1427H/2006